

湖海樓全集



湖海樓儷體文集卷第四

宜興陳維崧其年著

邑後學任光奇重校

藝圃詩序

藝圃者姜如農先生仲子學在所居也其先爲文文肅公清瑤璵又先爲袁憲

副某堂水木清幽洲島閒曠最爲吳中勝處學在讀書其中旁列古彝鼎及茶鐻酒董諸小物

一日吾友吳園次過其齋頭頃刻爲賦詩四十首學在梓而傳之并屬予爲序云

蓋聞夏鑄九鼎原非旦夕所成漢起千門初豈咄嗟能
辦蜂釀花而作蜜定費經營狐集腋以成裘恒資襞績
宋人之鏤楮葉請以三年魯客之造木鳶期之數載借
非蛟蜃奚緣噓俄頃之樓除是仙靈或解熟逡巡之酒
三都待鍊藁乍削以還焚兩賦當研毫縱含而每腐何

來巧製敏屬神輸乃有華文贍同夙構爐熏未熄千章
盈芍藥之花鉢響還留百軸溢蒲桃之樹在作者尙矜
其極筆至旁觀益侈爲美談麗矣名篇猗歟盛事時則
迢迢金谷直控雞陂隱隱銅街袞通鶴市零朱賸粉是
前代之空園卧碣橫碑得昔賢之故第袁太尉池亭閬
若喬木斯存文潞公閱閱巋然平泉尙在朱門換主空
餘故老之流傳青瑣騎箕彌切佳郎之顧慕舊說萊陽
仲子幼便能文爭誇天水次公賢而好客則有畫省望
郎雄州名守偶作牆東之客潛爲垞北之游樊條藉卉
嘉賓因適興以忘歸散帙攤書賢主遂濡毫而請賦斯

時也紅鵝館裏宿雨催晴碧鴨闌邊嫩涼滌暑水明天
淡旣駛駛以宜人簞滑甌香復蕭疎而稱意爰披雪蠶
用染霜鋒沈思而風雨忽來狂叫而蛟螭沓舞五言十
二半微雲疎雨之吟七律八章多劍拔弩張之態蓋其
感慨在心故爾宮商應手問庾子山之第宅能不興哀
過嵇叔夜之園林可無流涕干尋玳瑁一架珊瑚織成
寶罽偏熏石葉之香疊得花牋更養成都之粉飛揚跋
扈筆不能休頓挫激昂文無加點曹子桓城南會獵正
獸肥草淺之時管公明席上清談是耳熱杯闌之後無
何而日隱西崑星翻北渚小胥腕脫屢促更衣上客神

來堅祈刻燭於是盡敞席珍縱陳櫝韞恢奇俶詭如觀
伯翳之經炫燿焜熿疑入波斯之肆爰有蔡邕籀篆曹
霸丹青銅肌蛙綠獰如西極之辟邪玉暈皺紅豔若南
荒之鸚鵡攜來筇杖竹無淚以恒斑結就焦團櫻未瘳
而先紫六宮脂盞隱隱啼粧七尺唾壺芒芒冤氣甯第
漆園小吏牀頭之蝴蝶仍來非徒管氏夫人硯裏之鴛
鴦不去凡諸長物悉付短歌憑老興以淋漓橫禿衿而
跳盪嚼呿鞞鞞渴羌食酒之聲猥銳嫖姚猛士斫營之
狀憑欄以眺乍蟾魄之東升擲筆而狂驟蟲吟之西起
會且歸矣行當俟後之人于胥樂兮詩亦如前之數僕

也匿影殘冬棲踪他縣一緘索序難尋避債之臺五夜
成篇聊附折梅之驛攬早謝之江花徒憎予拙蔭同行
之潘果彌覺卿妍深媿續貂奚堪引鳳

生并不可不

1994

蘇東坡詩集卷之五

歸田倡和詩序

貝邱畢載積先生青社名家烏衣巨閥系傳姬籙宗倍
亢於毛鄭姓著齊封族更華於高國若乃綠碑突兀秦
丞相所以登封朱邸崔巍王文考於焉作賦三千技擊
水朝百谷之王十二諸侯地扼中原之吭青州國勢首
重淄川天上星精尤推畢宿江東顧陸隴右崔韋聯茵
則繡幃齊褰列宅則戟門對啟大兄康樂晨游朱雀之
門小弟清河暮宿蒼龍之闥竇長君意氣名冠東京桓
元子風流姻連北闕然而井湧忠泉庭生孝笋于公子
弟衆盡識其高門石氏家風無不稱爲長者陸機舊德

祇事詩書顏峻清規不談權要泊乎大司農白陽先生
出珥貂蟬入升鼎鉉班資並茂蕭相國之元功品地逾
崇宋尚書之素望於是瑞協金環祥呈珠樹東國華宗
知次公之早貴南朝妙族識仲孺之先榮司農公三子
先生其第二也先生幼卽明通長而岐嶷麒麟爲目果
天上之佳兒鸚鵡成篇信人間之才子無如甫號勝衣
便逢多難纔離毀齒浮厯百憂當我先生拜袞之年卽
令府君騎箕之歲斯時也伯起預亡少孤尙幼先生隻
身卹緯中夜茹荼弱必致哀貧能備禮西園賜鏹置守
塚之千家北府爲瑩給饒歌之十部傾都以送相此歌

虞遶墓而觀憐其嘔血至夫武安見螯博陸相傾安釐
母弟懼兵革之飄離田單宗人痛鄉廬之轉播先生閱
厯故未易覩縷述也旣而策名闕下受爵朝端綰組高
梁卓異推於朝議牽絲絳縣清白治夫輿情尋以新恩
遷之今秩原夫崇川之城郭也者雄關夙抱旣歲久而
輒傾天塹新開又時移而潮嚙先生飭此干楸勞其版
築星言而出參佐陪庾亮之牀露坐以臨城角奏劉琨
之笛千尋雉堞甯勞下瀨戈船百里金甌詎事征南戰
艦軍則已名君子城應祇號呂公又崇川之土地也者
民鮮奇贏田多斥鹵六月誌大雨雹百里書無麥禾甚

而家亡戶絕鬼類夏畦抑且岸圻沙圻人同魚鱉公洒
血上書單車入告叩闥有路願除已去之丁竊祿何情
冀緩難供之餉兩年惠政人思以賈姓名兒一郡仁聲
衆共曰杜公吾母詎民命之不猶值君門之甚阻謗生
一篋誰明良吏之冤釁起二桃孰辨遠臣之枉先生乃
失馬不驚掇蜂無懼珠生字裏淮南招隱之篇霞蔚行
間平子歸田之賦傳之官閣播此通衢凡茲食息之倫
疇忘生成之感或鄴都耆宿素蒙鮑叔之知或吳國英
年久動蔡邕之歎或金閨貴客手題慕德之碑或石戶
逸民口誦銜恩之作或金張許史之姓庇宇車前或東

西南北之人擔簦閣下甚至談風論月休上人之才情
繡虎描鸞曹大家之述作人爲四咏緒有百端某以菲
才辱公隆遇珠枯滄海久無照乘之期玉碎崑岡永斷
償城之望幸高軒之不棄乃下士之俱收爰於茲集之
成重命鄙人爲序裘稱狐腋慚茲麻枲爲緣琴號龍唇
媿以祝圉作倡敢誇流水用景高山

宮紫元先生春雨草堂詩序

蓋聞嚴霜貫葉寄跡何由滄海橫流容身無所志士抱
羈孤之戚貞臣興轉徙之嗟然而莊名白石猶有故侯
家近藍田非無舊將卯金劍去張平子以此歸田典午
星移王逸少於焉誓墓競說愚公之谷相傳處士之廬
僕以客游時焉浪跡偶過海陵之郭獲登春雨之堂其
堂也厯落嵯峨嶒泓蕭瑟接天睥睨依稀潘岳之面城
撲地閭閻髣髴晏嬰之近市蘭橈夾峙望若鴛鴦複道
中迴形如蟠螭文廊碁布綺館星羅珠簾共鶴露齊垂
繡障與雁風同捲況復關通南海雲水一區地號西湖

烟波萬頃鷓鴣鳬鵲真同鏡裏之裝蒲稗菰蔣不異空
中之市王司州流連卽渚欣賞絕多謝太傅嘯傲剡溪
襟情不少爰乃被以紫莖繚之紅藥王家仲寶府種芙
蓉陸君慧曉門栽楊柳文禽翔於綠水翠羽拂於朱軒
固已石留貞女之形甯徒果得隱夫之號時則風吹鍛
竈人是嵇康月冷匡牀主稱向詔披鹿裘而泮渙載鶴
擎以娑娑手中麈尾皆過江支許之談案上牛腰悉入
洛機雲之作隱囊紗帽宛矣風流屐齒巾箱翩其姿致
若夫故都玉樹感不忘心舊事金盤悲難去口聽關河
之輦策旣足嬰情見鄉國之旌旗奚堪拭涕心如饑雀

墮此空倉骨似飛龍落來藥店三年石闕豈無懊惱之
歌五夜彈棋大似不平之局時則憑檻悲歌登樓慷慨
王敦閣內惟多缺盡之壺陶侃齋頭祇有運來之甃於
是東都好事南國名流並贈詩章咸投卷牘宋風謝雪
龍虎跳於行間何粉荀香珠玉生於字裏珍踰趙璧光
嫋隋珠崧樗櫟庸材菰蘆下士當年龍廡差有姓名舊
日射棚頗多儔侶訪羅含之宅幸觀斯堂銜山簡之杯
乃爲茲序所喜虬鸞在後悉高山流水之音深慚糠粃
當前媿白雪陽阿之曲言歸二酉兼慰雙丁

